

इवनिंग डोगरी न्यूज़ बुलेटिन  
समे-18:15 Hrs

### Headlines

- 1 भारत नै बरे 2023-24 च रक्षा उत्पादन दे मुल्ल च अजें तगर दा सब्बनें शा मता बाद्दा दर्ज कीता ऐ, प्रधानमंत्री होरें रक्षा उत्पादन दे मुल्ल च एह वृद्धि हासल करने लेई देश दी सराहना कीती।
- 2 प्रधानमंत्री नरेंद्र मोदी होरें ओलंपिक च हिस्सा लैने लेई पेरिस जा'रदे भारतीय दल कन्नै मलाटी कीती।
- 3 स्वास्थ्य ते परौआर कल्याण मंत्री जे.पी. नड्डा होरें आखेआ ऐ जे भारत नै वैश्विक औसत दी तुलना च बड़ी तेज गति कन्नै मां ते बच्चें दा जीवन बचाने च सुधार लेआने च शानदार उपलब्धि हासल कीती ऐ।
- 4 डिप्टी कमिशनर बसीर उल हक चौधरी होरें आकांक्षी ब्लाक प्रोग्राम-ए.बी.पी तैहत ब्लाक खारी च सम्पूर्णता अभियान दी शुरूआत कीती।

<><><><><><>

### Rajnath-Defence

भारत नै 2023-24 बरे च रक्षा उत्पादन दे मुल्लें च अज्जै तोड़ी दी सब्बनें शा बद्द विकास दर दर्ज कीती ऐ। 2023-24 बरे च उत्पादन दा मुल्ल कोई 1 लख 27 ज्हार करोड़ रपे तोड़ी पुज्जी गया ऐ जेडा जे पिच्छले माली बरे दे उत्पादन मुल्ल दे मकाबले 16 अशारिया 8 फीसद मता ऐ। सोशल मीडिया पोस्ट उप्पर जानकारी गी सांझा करदे होई रक्षा मंत्री राजनाथ सिंह होरें आखेआ जे प्रधानमंत्री नरेंद्र मोदी हुंदी अगुवाई च साल दर साल मेक इन इंडिया नमें मील दे पत्थर पार करा'रदा ऐ। श्री सिंह हों उद्योग जेदे च रक्षा सार्वजनिक क्षेत्र ते एहदे नै सरबन्धित होरनें सार्वजनिक क्षेत्रें जेदे च रखा उपकरणें दा उत्पादन हुंदा ऐ ते होरनें निजी उद्योगें गी इस ताई ममारखां दित्तियां न। उनें आखेआ जे सरकार भारत गी वैश्विक अगुआ रक्षा उत्पादन केंद्र बनाने लेई साजगार माहौल तैयार करने गित्तै बचने बज्जी दी ऐ।

<><><><><><>

### PM-Defence

प्रधानमंत्री नरेंद्र मोदी होरें मुल्ले गी 2023-24 बरे च रक्षा उत्पादन दे मुल्लें च हुनै तोड़ी दे सब्बनें शा बद्द विकास दर हासल करने गित्तै ममारखां दित्तियां न। इक सोशल मीडिया पोस्ट च श्री मोदी होरें इस गी हौसला बदाने आह्ला पडाहू दस्सेया। उनें इस गित्तै योगदान देने आह्लें गित्तै सिफ्त कीती। उनें आखेआ जे मुल्ले गी अगुआ वैश्विक रक्षा उत्पादन केंद्र बनाने गित्तै सरकार साथ-सहयोग ते साजगार माहौल ते क्षमताएं गी होर बेहतर बनाने गित्तै बचने-बज्जी दी ऐ। उनें आखेआ जे इस राएं देश दी सुरक्षा क्षमता ते उपकरणें गी बेहतर बनाने ते भारत गी आत्मनिर्भर बनाने गित्तै बत्त पदरी होगा।

<><><><><><>

### PM-Olympic-Court

प्रधानमंत्री नरेंद्र मोदी होरें पेरिस च ओलंपिक्स च शामिल होने जा'रदे भारतीय खडारियें कन्नै मलाटी कीती ते एथलेटें कन्नै गल्लबात करदे होई श्री मोदी होरें मेद बुज्जी जे एहू खडारी भारत दा मान बदांगन। उनें आखेआ जे ओलंपिक्स छुडा जित्त लेई इक बडा मौका नेई मगरा किश सिक्खने दा बी इक मौका ऐ। श्री मोदी होरें आखेआ जे खडारियें गी अग्गे बदिये जित्त हासल करना ते सारें विपरीत परिस्थितियें ते हालात गी इक पास्से रक्खिये जित्त उप्पर ध्यान केंद्रित करना लोडचदा ऐ। खेडू दी दुनिया च लगातार अभ्यास करने दी जरूरतें बारें चेत्ता करदे होई श्री मोदी होरें खडारियें गी जित्त हासिल करने गित्तै हुनर उप्पर भरोसा रखने, सिखलाई, ते लगातार बेहतर प्रदर्शन उप्पर ध्यान देने दे बारे आखेआ। उनें भरोसा जताया जे सब्बै खडारी इस बारें सब्बै पराने रिकार्ड त्रोड़ी देंगन। उनें सब्बनें एथलीटें दी सराहना कीती ते उनें देसै लेई किश करने दे मौके दे बारे चेत्ता नुआया। प्रधानमंत्री होरें आखेआ जे इस समय सरकार नै भारतीय एथलीटें गी संपर्क दी असानी गित्तै पेरिस च भारतीय समुदाय गी सक्रियता ताई प्रयास कीते न। श्री मोदी होरें आखेआ जे मुल्लें दा 2036 बरे च ओलंपिक्स दी मेजबानी करने दी मेद ऐ ते इसा गित्तै लगातार खास करिये ढांचागत विकास च प्रयास कीते जा'रदे न।

<><><><><><>

## PM-Keir Starmer

प्रधानमंत्री नरेंद्र मोदी होंरें ब्रिटेन दे संसदीय चुनाव च लेबर पार्टी दी शानदार जित्त तगरां पार्टी नेता कीर स्टार्मर होंरें गी मुबारकबाद दिती ऐ। मोदी होंरें आखेआ जे ओहू भारत ब्रिटेन व्यापक रणनीतिक सांझेदारी गी होंर मजबूत करने लेई उंदे सकारात्मक ते रचनात्मक सहयोग दी मेद करदे न। मोदी होंरें भारत ब्रिटेन रिश्ते च सकारात्मक मजबूती लेआने लेई रिषी सुनक हुंदा बी आभार प्रगट कीता।

<><><><><><>

## NEET-PG

नीट-पी.जी. एंट्रेंस म्तेहान 2024 अगले म्हीने दी 11 तरीक गी दऊं शिफ्टें च लैता जाग। एहू म्तेहान पिछले म्हीने म्तेयान दे ठीक इक्क दिन पैहले कथित गड़बड़ी दे दोष दे चलदे स्थगित करी दित्ता गेआ ह। मेडिकल साइंसस म्तेआनें सरबंधी राश्ट्रीय बोर्ड इस म्तेआन दी हून इस नमीं तरीक दा अज्ज ऐलान कीता ऐ।

<><><><><><>

## ONGC-MC Yatra

तेल ते कुदरती गैसें सरबंधी कारपोरेशन ओ.एन.जी.सी आस्सेआ जात्तरा आधार शिविर चंदनवाड़ी च 100 बिस्तें दी सुविधा आहला इक्क अस्पताल स्थापित कीता गेआ ऐ। अमरनाथ जात्तरा दे रूट उप्पर मौजूद एहू अस्पताल जात्तरा दौरान यात्रुएं गी मेडिकल सहयोग देग। पिछले बरे तगर जात्तरा दे हर इक रूट उप्पर चिकित्सा दी आरजी स्थूलतां दिती जा'रदी ही। एहू अस्पताल जात्तरा दे बाद बी लोकें गी चिकित्सा सरबंधी स्थूलतां दिंदा रौहग।

<><><><><><>

## Prakash-Ramban

रामबन जिले दे बटोट जिले च अज्ज सिक्खें दे 6में गुरु श्री हरगोबिंद साहेब जी हुंदा प्रकाशोत्सव धार्मिक श्रद्धा ते उत्साह न्नै मनाया गेआ। इस मौके उप्पर रागी जत्ये दी तरफा शब्द कीर्तन दा आयोजन कीता गेआ। स्हाडे संवाददाता कन्नै गल्ल करदे होई रामबन दे जिला गुरुद्वारा प्रबंधक कमेटी दे मिम्बर जनक सिंह होंरें आखेआ।

<><><><><><>

## Nadda-Geneva-Meeting

सेहत ते परोआर मल्याण मंत्री जगत प्रकाश नड्डा होंरें आखेआ जे भारत च वैश्विक औसत दे मकाबले जच्चा-बच्चा दे जीवन गी बचाने च बेहतरी दर्ज कीती ऐ, जनेवा च Partnership for maternal new born and child health board दी बैठका गी वर्चुअली संबोधित करदे होई श्री नड्डा होंरें बोर्ड दी महिलाएं, बच्चें ते व्यस्कें प्रति लम्में समें थमां बचनबद्धता गी सराहेया। उनें टिप्पणी कीती जे भ्याल ते पैहलें गी हत्थ च लैते जाने कन्नै भविक्ख लेई तगड़ी नीहू रक्खी जा'रदी ऐ। PMNCH च वैश्विक दक्खन दी अवाज दी नुमायंदगी करदे होई श्री नड्डा होंरें आखेआ जे भारत नै वैश्विक दक्खन ते वैश्विक उत्तर बश्कार संतुलन बनाने गितै एहदे उप्पर कीते मते बरें थमां कम्म कीता ऐ। मंत्री होंरें आखेआ जे भ्याल किट्टे दे उपाध्यक्ष दे तौरा पर भारत महिलाएं, बच्चें ते व्यस्कें दी सुरक्षा सरबंधी मुद्दे गी अग्गे तोड़ी पुजाने गितै बचने बज्झी दी ऐ। एहदे च नौजवानें गी सेही बत्त दस्सने, लिंग समानता जनेई मुद्दे बी शामिल न। श्री नड्डा होंरें आखेआ जे भारत दा व्यापक सेहत कार्जक्रम 2030 बरे दी समय-सीमा कौला मता गै पैहले टिकाऊ विकास आहले लक्ष्य गी हासल करने च रूज्जे दा ऐं उनें PMNCH गी भारत सरकार आस्सेआ माली सहायता देने दा बी आश्वासन दित्ता।

<><><><><><>

## Apurva-AIIMS

केंद्री सेहत सचिव अपूर्वा चंद्रा होंरें कल विजयपुर च एम्स जम्मू दा दौरा लाया ते मरीजें ते विद्यार्थियें गी मिने आहलियें बक्ख-बक्ख सुविधाएं दा उद्घाटन कीता। इस मौके उन्दे कन्नै प्रधानमंत्री स्वास्थ्य सुरक्षा योजना दियां जायंट सेक्रेटरी अंकिता बुंदेला

मिश्रा ते केंद्री सेहत ते परौआर कल्याण मंत्रालय दे जायंट सेकरेटरी विजय कुमार सिन्हा होर बी उत्थे मौजूद हे। अपूर्वा चंद्रा होरें अस्पताल दे बक्ख-बक्ख ब्लाकें ते ओपीडी दा दौरा लाया। केंद्री सेहत सचिव होरें इस दौरान 24 घैंटें कम्म करने आहली डायग्नोस्टिक लैब दा बी उद्घाटन कीता।

<><><><><><>

### Sampoorna

जम्मू-कश्मीर खित्ते दे पूरे पराते विकास दे मद्देनजर जिला प्रशासन रामबन नै डिप्टी कमिशनर बसीर उल हक चौधरी हुंदी अगुवाई च कल खारी ब्लाक च विकास तांग आहले आकांक्षी ब्लाक प्रोग्राम ए.बी.पी तैहत सम्पूर्णता अभियान दी शुरूआत कीती। एहदा उद्देश्य विकास दी विनाह उप्पर पिछड़े दे क्षेत्रें दे प्रदर्शन च सुधार लेआना ते समावेशी विकास च मदाद लेई संसाधनें दा विकास करना ऐ। प्रोग्राम दी प्रधानता रामबन दे डीडीसी प्रधान डा. शमशाद शान होरें डिप्टी कमिशनर बसीर उल हक चौधरी नीति आयोग दे सीनियर साइंटिस्ट जगदीश कुमार होरें कीती। इस मौके पर बोलदे होई डीडीसी प्रधान होरें आखेआ जे सम्पूर्णता अभियान विकास दे बश्कार दे छिंडे गी खत्म करोग ते सब्बनें लोकें गी बुनियादी सहूलतां ते उंदे जीन जीने दे तरीके च सुधार करोग। इस मौके डिप्टी कमिशनर होरें आखेआ जे शिक्षा गै इकमात्र जरिया ऐ जेदे राएं अस महिलाएं ते कुडियें दी योग्यता गी होर सशक्त करी सकने आं। असेंगी महिला साक्षरता गी हर इलाके तगर पजाइये उनेंगी आत्मनिर्भर बनाना लोडचदा ऐ। नीति आयोग दे वरिष्ठ वैज्ञानिक होरें इस मौके आखेआ जे आकांक्षी ब्लॉक प्रोग्राम दी शुरूआत प्रधानमंत्री नरेंद्र मोदी होरें 2023 बरे च कीता हा। एहदा उद्देश्य हर इक आकांक्षी ब्लाक तगर सेहत, खान-पान, शिक्षा, पीने आहला पानी, साफ-सफाई, कृषि ते होर दुइयें बुनियादी सहूलतें गी पजाना ऐ। नीति आयोग नै 4 जुलाई थमां 30 सितंबर 2024 तगर सम्पूर्णता अभियान दी शुरूआत कीती ऐ।

<><><><><><>

### Green-Reasi

रियासी जिले दे इक ग्रां विजयपुर दे 47 बरे दे बसनीक राज कुमार जेडे जे साबका आई.बी.पी दे हवलदार रेई चुके दे न, उनें रियासी गी हरा-भरा बनाने दी पक्क ध्याई दी ऐ। अपने इस जज्वे गी पूरा करदे होई उनें रियासी दे 11 ग्राएं च अम्ब, अमरूद, जामुन ते इयै जनेह बक्ख-बक्ख स्मिं दे 20 जहार रूक्ख-बूहटे लाए न। स्हाडे संवादाता कन्नै गल्ल करदे होई राज कुमार होरें दस्सेया।

<><><><><><>

### Ashwani-Vaishnav

केंद्री मंत्री अश्विनी वैष्णव होरें अज्ज आखेआ जे इस बरे भारतीय रेलवे 2 जहार 500 रेल गड्डियें दे डब्बे तैयार करोग ते एहदे बाद 10 जहार होर नमें जनरल कोच तैयार करोग। इस मौके भारती रेल दी गतिशक्ति विश्वविद्यालय ते प्रमुख व्यवसायिक व्हाई ज्हाज बनाने आहली एयरबस बश्कार समझौता पत्तर उप्पर दस्तखत करदे बेल्ले श्री वैष्णव होरें आखेआ जे सरकार दा मुख ध्यान आर्थिक तौरा पर समाज दे कमजोर ते मध्य वर्ग गी सहायता देना ऐ। उनें आखेआ जे प्रधानमंत्री नरेंद्र मोदी हुंदे आस्सेआ पिछले बरे अमृत भारत ट्रेनें गी शुरू कराने पिच्छे बी इये मकसद हा। श्री वैष्णव होरें जानकारी दिती जे रेलवे नै इस गर्मी दी रूतै च कोई 10 जहार विशेष ट्रेनां भारी मंगें उप्पर चलाई ऐ। उनें जानकारी दिती जे 50 होरनें अमृत भारत ट्रेनां बनानियां पैहलें गै शुरू होई गेइयां न ते कवच गी बी शुरू करने गितै तेजी नै कम्म चला'रदा ऐ।

<><><><><><>

### PIB

सीनियर इंडियन इन्फार्मेशन सर्विस आफिसर धीरेंद्र ओझा होरें गी प्रेस इन्फार्मेशन ब्यूरो-पी.बाआई.बी दा डरैक्टर जनरल नियुक्त कीता गेआ ऐ। श्री ओझा होर शेफाली शरण दी थाहर लौगन जिनेंगी प्रकाशन प्रभाग दा महानिदेशक नियुक्त कीता गेआ ऐ।

<><><><><><>